



2018-miit ukiuni marluogallartuni misiliilluni unnukkut ammasartussamik (nal. 16-24) nuna tamakkerlugu call-centerimik, Nuna tamakkerlugu Ilitsersuisarfik (NTI-p) ataani pilersitsinissamat Naalakkersuisut peqquneqarnissaannik Inatsisartut aalajangiiffigisassaattut siunnersuut. Call-Centeri sukkasuumik kinaassutsimillu isertuussilluni ilinniartunut, ilinniarnikut, aningaasatigut inuttulluunniit ajornartorsiuteqartunut ikorfartuissaaq siunnersuisarlunilu. Call-centerip aamma taamatut siunnersuisarsinnaassaaq ilinniartut ilaqutaannut.

(Inatsisartunut ilaasortaq Nivi Olsen, Demokraatit)

Inuit Ataqatigiit Nivi Olsen qutsavigiumavaat pitsaalluinnartumik ilinniartunut tapersersuutaasinnaasumut siunnersortittarfimmik siunnersuuteqarneranut.

Isumaqataalluinnarpugut inuusuttut ilinniakkaminnik unitsitsiinnartartut ikilisarnissaannik sutigut tamatigut iliuuseqartariaqarnitsinni. Ilinniakkerinermik tapersersortit, ilinniartitsisut isumassuisinnaasut, ullaakkut itersaasartut, ilinniartinni nerisaqarsinnaaneq allarpassuillu ilinniartunut tapersersuutaasut taakkartorsinnaavagut ullumikkut atuuttut.

Ullutsinni inuusuttut ilinniartut ilarpaalussui tarnikkut innarlugaasimanertik pillugu ilinniartuunermi naalliuuteqalersinnaasarput. Inuusuttut amerlanerit nunatsinni ilinniagaqartut siusissukkat angajoqqaatik qimattarpaat, nammineerniarsaralutik kolligiamilu inooqataaneq peqataaffiginiartarlugu.

Isumaqatigaarput siunnersuuteqartup ilinniartut saaffigisassaannik sianerfigineqarsinnaasumik pilersitsiniarmat. Isumassarsiatsialassuuvoq, ingerlareerporligooq. Naalakkersuisut akissuteqaataanni

ikiorsiinerit, tarnip pissusaanik ilisimasalinnik ikiorneqarsinnaanerit allallu ingerlapput. Tamakku ilinniartunut atorluaqqunaqaat, kissaatiginaqaarlu tamakku iluaqutigalugit ilinniartut amerlanerit ilinniakkaminnik naammassinnittarumaartut.

Qanortoq suliaq ingerlareersoq ukiut ingerlaneranni misilittagartusinermilu annertusarneqarili. Periarfissaasut assigiinngitsut qulaajarumallugit siunnersuut ataatsimiititaliamut ingerlakkumavarput.